

Izjava visokog predstavnika i specijalnog predstavnika EU Miroslava Lajčáka



Pred Bosnom i Hercegovinom se nalazi dugačak put i mnogo napornog rada i kompromisa, ali danas, svi mi: građani BiH, politički lideri i međunarodna zajednica, možemo sebi dozvoliti trenutak za čestitanje.

Iako su pred nama mnogi izazovi, nikada ne smijemo zaboraviti koliko smo odmakli u ovih trinaest godina od kada je zemlja razorena godinama krvavog rata koji je podijelio zajednice u BiH. Za ove pomake zaslužni su ljudi iz Bosne i Hercegovine.

Politički lideri su pokazali da mogu naći zajednički jezik koji je potreban da se ova zemlja dovede na put članstva u EU – puta sa kojeg, nakon što se uputila njime, ni jedna zemlja nije skrenula.

Ovo je trenutak zadovoljstva i radosti za sve zemlje koje su uložile ogromna sredstva u izgradnju BiH. Zadovoljni mogu biti i svi oni koji su napustili svoje zemlje kako bi došli da rade za Bosnu i Hercegovinu.

Uspjeh koji obilježavamo danas je uspjeh Bosne i Hercegovine, kao što su i izazovi koji predstoje izazovi za Bosnu i Hercegovinu.

Sa svoje strane, Evropska unija je danas još jednom potvrdila svoju privrženost Bosni i Hercegovini. Potvrdila je svoju

namjeru da pomogne Bosni i Hercegovini da uspješno realizuje cilj priključenja Evropskoj uniji, što je garancija da se zemlja nikada više neće vratiti krvavim sukobima.

Upravo je namjera da se onemoguće budući konflikti bila glavni poticaj za stvaranje EU prije pedeset godina, a danas je ta ista ideja objašnjenje zašto je podrška Evropskoj uniji u Bosni i Hercegovini tako ogromna i stalno jača: posljednje ankete pokazuju da je podrška za ulazak u Evropsku uniju dosegla 85%. Ova podrška je i rezultat naše kampanje o EU, tokom koje sam posjetio 16 gradova širom BiH i razgovarao sam hiljadama građana o integraciji BiH u Evropsku uniju.

Evropska unija je ohrabrena ovakvom podrškom, dok lideri u Bosni i Hercegovini sada ne smiju iznevjeriti ovako velika očekivanja građana.

Kada sporazum za dvije sedmice stupi na snagu, politički lideri Bosne i Hercegovine i njene institucije moraju biti spremni – a mi, iz EU, smo i dalje tu da pomognemo.